

La Quotidiana 5-8-2015, p. 11

## Anna-Alice Dazzi lavura da nov sin basa da mandat per la Lia Rumantscha

■ (lr) Suentar 32 onns tar la Lia Rumantscha (LR) è *Anna-Alice Dazzi* sa decidida da metter novs accents professiunals. A partir da l'avust lavura ella sin basa da mandat per la LR. Sco collavuratura libra è ella responsabla per il svilup da concepts per il rumantsch en la diaspora.

La linguista da 57 onns è stada activa en differentas funcziuns durant ses engaschament a la LR. Sco davos ha ella manà durant set onns la partiziun Lingua ed è stada commembra da la direcziun da la LR. «Nus essan fitg cuntents che Anna-Alice Dazzi stat vinavant a nossa disposiziun sco collavuratura libra. Per pudair promover il rumantsch er ordaifer il territori linguistic èsi indispensabel d'avair ina persuna cun la savida e l'experiencescha dad Anna-Alice Dazzi», di *Urs Cadruvi*, il secretari general da la LR. Anna-Alice Dazzi vegn ad elavurar concepts/recepts per promover il rumantsch en la diaspora.

Anna-Alice Dazzi è stada cunautura dals emprims dicziunaris en rumantsch grischun. L'onn 2010 l'ha il chantun Grischun undrà ella per sia lavur persvadenza en connex cun il svilup dal rumantsch grischun e per ses engaschi en favur da la lingua e cultura rumantscha. Dapi il 2014 lavura Anna-Alice Dazzi dasper ses engaschi tar la LR era tar RTR Radiotelevisiun Svizra Rumantscha sco linguista e coach.



**Anna-Alice Dazzi.**